



# О‘ЗБЕКИСТОН RESPUBLIKASI PREZIDENTINING FARMONI

2026 yil «16» февраль

ПФ–22 -son

## **“Маҳаллани ривожлантириш ва жамиятни юксалтириш” йилида устувор йўналишлар бўйича ислоҳотлар дастурлари ва “Ўзбекистон – 2030” стратегиясини амалга ошириш бўйича давлат дастури тўғрисида**

“Ўзбекистон–2030” стратегияси ҳамда Ўзбекистон Республикаси Президентининг Ўзбекистон халқи ва Олий Мажлисга Мурожаатномасида белгиланган ислоҳотлар ижросини самарали ташкил этиш мақсадида қарор қиламан:

**I. 2026 йилга мўлжалланган устувор ислоҳотларни белгилаш ва уларнинг ижросини ташкил этиш чора-тадбирлари**

**1. Қуйидагилар маҳаллани ривожлантириш бўйича амалга ошириладиган устувор ислоҳотларнинг асосий йўналишлари этиб белгилансин:**

- (а) маҳаллаларда 10 мингдан зиёд ишлаб чиқариш ва хизмат кўрсатиш лойиҳаларини ишга тушириш орқали қўшимча 100 мингта янги иш ўрнини яратиш;**
- (б) камбағаллик ва ишсизликдан холи маҳаллалар сонини 3,5 мингтага етказиш;**
- (в) маҳаллалар инфратузилмасини такомиллаштиришга 20 триллион сўм маблағ йўналтириб, уларга Янги Ўзбекистон қиёфасини олиб кириш;**
- (г) маҳаллалардаги муаммоларни бир вақтнинг ўзида тезкор ҳал этишда барча давлат органларига масъулиятни юклаб, ижрони 24/7 режимда онлайн назорат қилиш амалиётини йўлга қўйиш.**

2. Маҳаллалар инфратузилмасини такомиллаштириш ва уларга Янги Ўзбекистон қиёфасини олиб кириш бўйича устувор ислоҳотлар дастури (кейинги ўринларда – Маҳалладаги ислоҳотлар дастури) 1-иловага мувофиқ тасдиқлансин.
3. Бош вазир ўринбосарлари **Ж.Қўчқоров** ва **А.Раматов**, Ўзбекистон маҳаллалари уюшмаси раиси **К.Куранбаев** Маҳалладаги ислоҳотлар дастури ижросини таъминлаш ва белгиланган мақсадли кўрсаткичларга эришиш учун шахсан масъул этиб белгилансин.
4. Қуйидагилар **иқтисодий ислоҳотларнинг** асосий йўналишлари этиб белгилансин:
- (а) соҳа ва тармоқларни **технологик ўсиш моделига ўтказиш** орқали ялпи ички маҳсулот ҳажмини **2030 йилгача 240 миллиард АҚШ** долларида ошириш учун **зарур шароитларни** яратиш, жорий йилда ялпи ички маҳсулот ҳажмини **167 миллиард АҚШ** долларига етказиш;
  - (б) **иқтисодий ўсишни 6,6 фоизга** етказиш, **инфляция даражасини 6–6,5 фоизга** тушириш, **бюджет тақчиллигини** ялпи ички маҳсулотга нисбатан **3 фоиз** даражасида сақлаш;
  - (в) **1 миллион** нафар фуқарони **доимий иш** билан таъминлаш ва **263 минг** оилани **камбағалликдан чиқариш** орқали **камбағаллик даражасини 2,8 фоизгача** ҳамда **ишсизлик даражасини 4,5 фоизгача** тушириш;
  - (г) иқтисодиётга **50,4 миллиард АҚШ** доллари миқдоридаги хорижий инвестицияларни жалб қилиш учун зарур шароитларни яратиш;
  - (д) хизматлар бозори ҳажмини **100 миллиард АҚШ** долларида ошириш чораларини кўриш;
  - (ж) қурилиш ишлари ҳажмини **11 фоизга** кўпайтириб, **30 миллиард АҚШ** долларига етказиш ва **4 миллиард АҚШ** долларилик **3,5 мингдан** зиёд янги хизмат кўрсатиш объектлари ишга туширилишини таъминлаш.

5. Иқтисодиётни технологик ва инновацион ўсиш моделига ўтказиш ҳамда ички бозорда талабни рағбатлантириш бўйича устувор ислоҳотлар дастури (кейинги ўринларда – Иқтисодий ислоҳотлар дастури) 2-иловага мувофиқ тасдиқлансин.
6. Бош вазир ўринбосарлари **Ж.Қўчқоров** ва **Ж.Ходжаев**, Марказий банк раиси **Т.Ишметов** Иқтисодий ислоҳотлар дастури ижросини таъминлаш ва белгиланган мақсадли кўрсаткичларга эришиш учун шахсан масъул этиб белгилансин.
7. Қуйидагилар касбларни ривожлантириш бўйича устувор ислоҳотларнинг асосий йўналишлари этиб белгилансин:
- (а) **2026/2027 ўқув йилидан бошлаб 7 та ҳудудда илғор касбий маҳорат техникумларида “Касблар шаҳарчалари”ни ташкил этиб, улар орқали мактаб ўқувчиларини замонавий касбларга йўналтириш;**
  - (б) **2026/2027 ўқув йилидан бошлаб техникумларда стипендия тўлаш амалиётини йўлга қўйиш;**
  - (в) ҳудудларда **24 та малакани баҳолаш марказларини ташкил этиб, меҳнат бозорида тан олинадиган сертификат беришни жорий этиш;**
  - (г) Германия, Швейцария, Буюк Британия, Хитой, Корея Республикаси каби давлатларнинг **илғор таълим дастурлари жорий қилинган техникумлар сонини 100 тага етказиш.**
8. Касбларни ривожлантириш ва янги меҳнат бозори архитектурасини яратиш бўйича устувор ислоҳотлар дастури (кейинги ўринларда – Касбларни ривожлантириш дастури) 3-иловага мувофиқ тасдиқлансин.
9. Бош вазир ўринбосари – иқтисодиёт ва молия вазири **Ж.Қўчқоров**, олий таълим, фан ва инновациялар вазири **К.Шарипов**, камбағалликни қисқартириш ва бандлик вазири **Б.Захидов** Касбларни ривожлантириш дастури ижросини таъминлаш ва белгиланган мақсадли кўрсаткичларга эришиш учун шахсан масъул этиб белгилансин.

**10. Қўйидагилар экологик мувозанатни таъминлаш ва сувдан оқилонга фойдаланишни ташкил этиш бўйича устувор ислохотларнинг асосий йўналишлари этиб белгилансин:**

- (а) илғор технологияларни жорий қилиш ҳисобига 7 миллиард метр куб табиий газни иқтисод қилиш ва атмосферага 11 миллион тонна зарарли моддалар чиқишининг олдини олиш;**
- (б) 2026/2027 ўқув йилидан бошлаб дуал таълим тизими асосида ҳар бир ҳудудда 14 та “яшил” техникум ташкил этиш;**
- (в) эксплуатация муддати ўтган автомобиллар утилизациясини ташкил этиш ва унинг компонентларини қайта ишлаш амалиётини йўлга қўйиш;**
- (г) электромобиль сотиб олишни рағбатлантириш учун аҳолига 16 фоизгача ставкада бўлган кредитлар ажратиш тартибини жорий этиш;**
- (д) очиқ дренаж, коллектор ва каналларни ёпиқ тизимга ўтказиш бўйича амалий тадбирларни ташкил этиш;**
- (ж) 504 минг гектар майдонда сув тежайдиган технологияларни жорий қилиш орқали 5 миллиард метр куб сув иқтисод қилинишини таъминлаш;**
- (з) 1,3 минг километр каналлар, суғориш тармоқлари ва бошқа ирригация объектларини бетонлаштириш орқали йилига қўшимча 500 миллион метр куб сув иқтисод қилинишини таъминлаш.**

**11. Экологик мувозанатни таъминлаш ва сувдан оқилонга фойдаланишни ташкил этиш бўйича устувор ислохотлар дастури 4-иловага мувофиқ тасдиқлансин.**

**12. Ўзбекистон Республикаси Президенти маслаҳатчиси – Экология ва иқлим ўзгариши миллий қўмитаси раиси А.Абдуҳақимов, Бош вазир ўринбосари Ж.Ходжаев, энергетика вазири – Ж.Мирзамахмудов тегишлилиги бўйича:**

- (а) Экологик мувозанатни таъминлаш ва сувдан оқилона фойдаланишни ташкил этиш бўйича устувор ислохотлар дастури ижросини таъминлаш;
- (б) белгиланган мақсадли кўрсаткичларга эришиш учун шахсан масъул этиб белгилансин.

13. Қуйидагилар давлат бошқаруви ва суд-ҳуқуқ тизимини такомиллаштириш бўйича устувор ислохотларнинг асосий йўналишлари этиб белгилансин:

- (а) Олий Мажлис палаталарининг ташқи қарзни бошқариш соҳасидаги ваколатларини кенгайтириш;
- (б) депутатларнинг экологик муаммолар оқибатларини юмшатиш доирасида аҳоли учун маҳаллаларда яшил боғлар, яшил жамоат паркларини ташкил этишдаги ваколатларини кенгайтириш;
- (в) жамиятни юксалтиришда ва мавжуд долзарб муаммоларни ҳал этишда давлат ва фуқаролик жамияти институтларининг бирлашган ҳолда ҳамнафас бўлиб фаолият юритишини таъминлаш;
- (г) ўта оғир жиноятларга доир ишларни судда жамоатчилик вакиллари иборат халқ вакиллари ҳайъати иштирокида кўриб чиқиш амалиётини жорий этиш;
- (д) жиноят процессида мажбурлов чоралари қўлланиши устидан суд назоратини кучайтириб, тергов судьялари ваколатларини кенгайтириш;
- (ж) коррупция, гиёҳвандлик, аёллар ва болаларга нисбатан зўравонлик каби жамият олдида турган долзарб муаммоларга қарши курашиш бўйича самарали тизимни йўлга қўйиш.

14. Давлат бошқаруви ва суд-ҳуқуқ тизимини такомиллаштириш, жамиятда бирдамликни таъминлаш орқали уни юксалтириш бўйича устувор ислохотлар дастури (кейинги ўринларда – Давлат бошқаруви ва суд-ҳуқуқ ислохотлари дастури) 5-иловага мувофиқ тасдиқлансин.

15. Ўзбекистон Республикаси Бош вазири **А.Арипов**, Олий суд раиси **Б.Исламов**, Судьялар олий кенгаши раиси **Х.Ёдгоров**, Бош прокурор **Н.Йўлдошев** тегишлилигига кўра Давлат бошқаруви ва суд-ҳуқуқ ислоҳотлари дастури ижросини таъминлаш ва белгиланган мақсадли кўрсаткичларга эришиш учун шахсан масъул этиб белгилансин.

16. Қуйидагилар:

(а) Бош вазир **А.Арипов** ислоҳотлар дастурларида назарда тутилган ташаббусларнинг **ўз вақтида, сифатли ва сўзсиз ижросини** таъминлаш, бу борада вазирлик ва идоралар фаолиятини **мувофиқлаштириб**, ижро ҳолатини **қатъий назоратга олиш** учун шахсан масъул этиб белгилансин;

(б) Қорақалпоғистон Республикаси Вазирлар Кенгаши **Раиси**, вилоятлар, Тошкент шаҳар ва туман (шаҳар)лар **ҳокимларига** ислоҳотлар дастурларини **ҳудудлар кесимида** амалга ошириш бўйича **шахсий масъулият юклансин**;

(в) ислоҳотлар дастурлари ижроси ва белгиланган мақсадли кўрсаткичларга эришилиши учун **масъул раҳбарлар ҳар чорак якуни** бўйича ислоҳотларнинг **ижро ҳолати** ва **натижадорлиги** юзасидан Ўзбекистон Республикаси Президентига **ахборот** бериб борсин;

(г) ислоҳотлар дастурларида ижро учун масъул вазирлик ва идоралар **икки ҳафта муддатда** тегишли бандларда йил якуни бўйича эришиладиган натижаларни **таъминлаш механизмлари** ва **чораклик самарадорлик кўрсаткичларни** назарда тутувчи иш режаларини ишлаб чиқиб, **тасдиқлаш ва уларнинг назоратини юритиш**, ижроси бўйича Ўзбекистон Республикаси Президентига ахборот бериб бориш учун Вазирлар Маҳкамасига киритсин.

II. “Ўзбекистон–2030” стратегиясини “Маҳаллани ривожлантириш ва жамиятни юксалтириш” йилида амалга оширишга оид давлат дастурини бажариш ва назорат қилиш

17. “Ўзбекистон–2030” стратегиясини “Маҳаллани ривожлантириш ва жамиятни юксалтириш” йилида амалга оширишга оид давлат дастури (кейинги ўринларда – Давлат дастури) доирасида қуйидагилар 6–8-иловаларга мувофиқ тасдиқлансин:

(а) амалий тадбирлар режаси;

(б) ишлаб чиқиладиган **норматив-ҳуқуқий ҳужжатлар лойиҳалари** рўйхати;

(в) **стратегик норматив-ҳуқуқий ҳужжатлар** лойиҳалари рўйхати.

18. Белгилансинки, мазкур Фармоннинг 17-бандида назарда тутилган норматив-ҳуқуқий ҳужжатлар **белгиланган тартибда қабул қилингандан сўнг** ижро назоратидан чиқарилади.

19. Қуйидагилар:

(а) Адлия вазирлиги ва Ҳисоб палатаси Давлат дастури доирасида:

(i) йўналишлар бўйича **амалий тадбирлар режалари** бажарилиши;

(ii) **мақсадли кўрсаткичларга** эришилиши;

(iii) тегишли **норматив-ҳуқуқий ҳужжатлар лойиҳалари** ишлаб чиқилиши бўйича **тизимли мониторинг** юритилишини таъминласин;

(б) **Стратегик ривожланиш ва ислоҳотлар агентлиги стратегик норматив-ҳуқуқий ҳужжатлар лойиҳалари рўйхатида** белгиланган норматив-ҳуқуқий ҳужжатлар лойиҳаларини ишлаб чиқиш ва келишиш жараёнларини **мувофиқлаштириб борсин**;

(в) “Тараққиёт стратегияси” маркази ва “Юксалиш” ҳаракати Давлат дастурининг **амалга оширилишини**, шу жумладан:

(i) жойларга чиқиб, жамоатчилик фикрини инобатга олган ҳолда **танқидий ўрганиб борсин**;

(ii) натижалари бўйича **ҳар ойда** Адлия вазирлиги, Ҳисоб палатаси ҳамда Стратегик ривожланиш ва ислоҳотлар агентлигига ахборот киритиб борсин;

(г) давлат ҳокимияти органлари, вазирлик ва идоралар, маҳаллий ижро этувчи ҳокимият органлари “Тараққиёт стратегияси” маркази ва “Юксалиш” ҳаракатининг **Давлат дастури ижросини ўрганиб бориш бўйича фаолиятига ҳар томонлама кўмаклашиб борсин**.

20. Вазирлар Маҳкамаси:

(а) **ҳар ой якуни бўйича** Давлат дастури ижроси юзасидан маълумотларни умумлаштириб, Ўзбекистон Республикаси Президенти Администрациясига киритиб борсин;

**(б) ҳар чорак якуни бўйича** Давлат дастурида юклатилган вазифаларнинг ўз вақтида ва сифатли бажарилишини Вазирлар Маҳкамасининг Раёсати йиғилишида муҳокама қилиб борсин;

**(в) ҳар ярим йилда** Давлат дастури ижроси юзасидан ҳисоботларни Олий Мажлис Қонунчилик палатасига киритиб борсин.

**21. Ўзбекистон Миллий телерадиокомпанияси, Ўзбекистон Миллий ахборот агентлиги ва Оммавий ахборот воситалари учун контент тайёрлаш маркази оммавий ахборот воситалари билан биргаликда мунтазам равишда:**

**(а) Давлат дастурини амалга ошириш натижалари** оммавий ахборот воситаларида, шу жумладан, интернет ва ижтимоий тармоқларда кенг шарҳлаб борилишини ҳамда унинг мазмун-моҳияти жамоатчиликка тушунтирилишини;

**(б) Давлат дастури доирасида амалга оширилаётган барча тадбирларнинг бориши ва натижалари** тўғрисидаги холис ва тўлиқ маълумотлар аҳолига тезкорлик билан етказилишини таъминласин.

**22. Мазкур Фармон ижросини самарали ташкил қилишга масъул ва шахсий жавобгар этиб вазирлик ва идоралар раҳбарлари, Қорақалпоғистон Республикаси Вазирлар Кенгаши Раиси, вилоятлар ва Тошкент шаҳар ҳокимлари белгилансин.**

**23. Мазкур Фармон ижросини мунтазам равишда муҳокама қилиб бориш, ижро учун масъул ташкилотлар фаолиятини мувофиқлаштириш ва назорат қилиш “Ўзбекистон – 2030” стратегиясини амалга ошириш бўйича республика комиссияси** зиммасига юклансин.

**24. Амалга оширилган чора-тадбирлар тўғрисида ҳар чоракда** Ўзбекистон Республикаси Президентига ахборот киритиб борилсин.

Ўзбекистон Республикаси  
Президенти

Тошкент шаҳри



Ш.Мирзиёев